








Centimetres

**TIPPEN** Color Control Patches

© The Tiffen Company, 2007







鶴徵後錄卷第六

與試未用二十六人

李紘字巨州江西臨川人雍正甲辰進士由大學士朱軾薦舉  
著有南園藁

諸草廬宮贊與巨州為甲辰同榜進士最為投契嘗有七愛

詩其一為巨州云臨川有李龍每見豁懷抱經戶閭無人披


帷富搜討悠然挹皇墳適意忘溫飽即此壺中冰可以蠲熱

惱江西詩徵以巨州官知縣乞假歸養母不出未知所據

詞科掌錄云李巨州本作川侍郎紘第六弟也登第後闕南

園養母不出南昌萬編修字兆亟稱之以薦來京第一場試

嘉興李富孫既甫輯



時賦彙爲人所竊不能省記遂納卷出所著有南園答問一篇與柳州晉問深寧七觀頡頏西江掌錄此焉爲最

詞科餘話云巨州養母不仕以座主高安公之薦出山有郡城登舟及會城別姪子元長詩皆就徵所作也又有北征和少陵韻詩仲兄穆堂侍郎及萬孺廬編修暨從孫友棠皆有和章

王文清字廷鑑號九溪湖南寧鄉人雍正甲辰進士原任岳州府教授由湖南巡撫鍾保薦舉後陞宗人府主事著有周禮會要考古畧考古原始鋤經餘草

先生性質樸淹通經籍而尤深於禮己巳大學士史貽直協辦大學士阿克敦刑部侍郎梅穀成俱以潛心經學交薦後入三禮館方望溪侍郎極爲推挹

夏醴谷王廷鑑詩序云唐宋以制科爲大科所得皆魁壘杰出不凡之士 國家循用舊典兩舉制科戊午之役得人滋盛今茲丙辰吾友胡君雲持于君廷鑑亦嘗挾筆橐研以應斯舉乃倉卒嬰義疾並見黜落人咸惜之雲持抱其所學日夕鹿鹿未暇有所撰次顧獨以詩名於京師廷鑑旣謝編纂之役布衣疏食杜門窮山中嘗著攷古源流一書條列品彙該悉衆有兩公詩故皆可傳然泰山華嶽包孕深富其不必以一草一木見奇也審矣

詞科掌錄云王廷鑑熟精三禮著有考古源流二百餘卷循例當外補兩中堂薦修三禮奏授中書科中書

周欽字 江南宜興人雍正甲辰舉人由戶部尚書史貽直薦舉

宜興儲氏自遜叟雪持兄弟以才學著而在陸先生繼之根柢經史蔚為家學六子胚胎濡染俱先後登科第發名成業稱為極盛先生天才清雋與六子相還往得其家法早以文名於世學問亦有本原非徒工於時藝者

劉始興字 江南金壇人雍正甲辰舉人由都察院左都御

史孫嘉淦薦舉後官霍邱縣教諭

先生鑽研經籍篤志不倦己巳安徽巡撫衛公哲治奉 詔保舉經學以志行不苟優於經學篤好講求現有著作刊傳薦之

姚焜字鸞伯江南桐城人雍正甲辰舉人興化縣教諭由兵部尚書江蘇巡撫高其倬薦舉

漳浦蔡文勤公以理學經濟倡導後進為翰林時 命侍讀

上書房備見敬禮遠近從遊者甚眾鸞伯亦執贄其門

劉斯組字斗田江西新建人雍正甲辰舉人由都察院左都御史孫嘉淦光祿寺卿劉吳龍交薦舉後官廣東西寧知縣著有周易撥易堂解太元別訓

斗田邃於經學試罷司諭分宜副都御史葉公一棟素知斗田己巳以經學貫通薦於 朝後宰西寧歷知杞縣有循良

聲所著撥易堂解前記梓此書時其婿夢二童歌詩曰不不不九六乾坤七四執黃農非古世非今理數瓜分一太極又

載著是書時其姪夢閣上有硃題發易閣三字因以爲名  
韓曾字續古江南長洲人雍正丙午舉人由戶部侍郎陳樹萱  
薦舉後官安徽泗州學正

續古爲宗伯文懿公之孫朝夕濡染庭訓學有源本時文懿  
公文望天下仰重海內名流半出其門續古皆得聆其緒論  
與兄洗馬彥曾並登丙午賢書名譽日盛

王延年字介猗浙江錢唐人雍正丙午舉人由太僕寺卿蔣漣  
薦舉後官國子監學正陞司業 賜翰林院侍講著有補通鑑

紀事本末

先生熟於諸史著述多可傳嘗以史編經進 賜國子監學  
正己巳戶部尙書蔣公溥工部尙書劉公統勳以經學交薦

俱稱其老成敦樸潛心經史登之啟事其於史學殆寢食以  
之錢樺石宗伯題其紀夢詩後云國子先生冬病腓夜夢有  
適戶闔扉立者胡來陳承祚坐者不識習彥威三揖立者答  
且顧一揖坐者蹇弗揮立者乃指坐者語帝魏之正其庶幾  
前身後身君豈憶盍卽寫此吟依稀白頭累舉猶未第史學  
可傳復何祈風寒夢回記其二一十四字懷珠璣足成六章  
章四句說夢向人人笑譏乾隆壬申會試以年逾耄耄由助  
教晉司業後 賜侍講屢荷 知遇尤爲稽古之榮

杭堇浦補通鑑紀事本末序云其此事也若春秋之決獄其  
著評也若月旦之方人一以爲建安之評臣也可一以爲涑  
水之別子也可然鉤較之抉摘之自髮未燥以迄於老之將

至蓋已三十易寒暑矣以史證經以鑑貫史居則成一家言舉而措之家國天下而裕如所謂有用之實學者此也故予比介眉於唐杜君卿宋劉仲原父世有讀其書則知予言之非妄也

詞科掌錄云王介眉史學洽熟以建安袁氏作通鑑紀事本末不言田制漕運所託始又唐不載府兵之制皆爲闕漏并取陳邦瞻馮琦所續者悉爲補編余嘗爲之序方丙午發策介眉引杜詩雲帆轉遼海之語謂海運不始於元爲虞山蔣文肅公所擊賞旣從吳門馮太史在史局草創儒林忠義兩傳旣應制府彭城公聘修浙志沿革離合之表分晰特詳遂爲全志之冠所撰述甚富

隨園詩話云吾鄉孝廉王介眉少嘗夢至一室祕帖古器雜然橫陳榻坐一叟短身白髮見客不起亦不言又有一人頽而黑揖介眉而言曰余漢之陳壽也作三國志黜劉帝魏實出無心不料後人以爲口實指榻上人曰賴彥威先生以漢晉春秋正之汝乃先生之後身聞方撰歷代編年紀事夙根在此須勉而成之言訖手授一卷書俾題六絕句而寤寤後僅記二句曰慚無漢晉春秋筆敢道前身是彥威後介眉年八十餘進呈所撰編年紀事 賜翰林侍講

甘禾字周書號愛廬江西奉新人雍正丙午舉人由順天府府尹陳守劄薦舉著有愛廬詩鈔

愛廬曾大父樂天翁家富於財好施與父莊恪公汝來位至

大冢宰雍正丙午大父萬達世父汝蓬暨愛廬同登賢書人咸以為厚德之報至今傳為盛事

甘莊恪公集云丙午秋九月二十九日粵西撫署得家君舍弟及禾兒鄉試捷音三世同榜喜而賦之詩云當年壯氣負

雄圖健舉如何駐副車家君甲子初應鄉試即中副榜今四十二年矣欲為科名增

盛事故遲孫子共賢書碧桐秀發新枝早丹桂香分老榦餘

莫羨前驅執爨者歛揚糠粃獨慚予

詞科掌錄云甘周書大司馬汝來之子少有詩才臨川李侍

郎素所激賞

江西詩徵云周書少聰敏有詩才為當時名公巨卿所推重

王祖庚字孫同號礪齋江南華亭人雍正丁未進士山西興縣

知縣由山西巡撫覺羅石麟薦舉捐陞主事出知隰州歷安徽

寧國知府著有礪齋詩鈔

先生為相國文恭公頊齡孫父諱圖焯康熙辛卯舉人先生

少負異稟潛心勤學雍正丙午丁未聯捷成進士謁選得山

西聞喜知縣自以不諳吏治求內用

世宗皇帝諭桐城相國曰想是他怕衝繁缺可傳旨山西巡撫

調一好簡缺赴山西巡撫石公遂奏補興縣遇大旱申請開

倉平糶不待報即令民赴倉買穀三日大雨民以安集丙辰

徵試鴻詞未與選捐部主事被薦在 武英殿校對書籍充

經史館纂修官辛酉秋

高宗皇帝以晉省吏治需才 命大臣各舉所知虞山蔣文恪

公以名送部出知隰州除戶書鹽課諸弊踰年移平定治績  
爲三晉冠以卓異擢直隸順德知府旋調保陽恭逢

聖駕巡幸及秋獮木蘭諸大典屢荷

召見奏對悉稱賑水災

捕旱蝗皆盡心力爲之在任八年膺卓異者再循例捐陞監  
司未得缺改補寧國知府抵江甬兩月而卒

詞科掌錄云王孫同後以需次選人閣學張天瓶薦校書

武英殿己未仲冬

皇上大閱南苑獻賦一首

詞科餘話云孫同家世詞科一門鼎盛早成進士出宰茂縣  
旣被徵書旋以循蜚 內召謂蓬瀛指顧可到一遭擯落與  
吳江迨耕石錢唐厲太鴻嘉善曹古謙聯袂出都

袁簡齋錫壽堂公讌詩序云元年余與王生同太守偕升名  
於鴻詞科今年入都領郡宣州亞相劉繩菴率諸徵士饒諸  
錫壽堂堂爲生同大父文恭公故第三十年來同人寥落與  
者七人庶子錢坤一爲寫七清圖各賦數詩憶枚 召試時  
才二十一歲在徵士錄中最居牘尾今又以不與會之故題  
詩亦居紙尾豈有數存乎其間耶卷中闕五律一體爲續成  
之又云余題生同公讌圖畢卽往蘇州生同捧檄來省竟未  
交付及余還山而君已怛化於毘廬菴矣展卷懷人悽愴不  
已重題二律付令嗣紹曾顯曾兩太史藏之

隨園詩話云松江王太守祖庚終身以不入詞館爲恨兩子  
皆入翰林而先生不樂也與彭芝庭尙書同出尹文端公門

下有納涼聞笛云碧空如水淨無雲斗轉參橫夜欲分長笛  
不知何處起好風偏送此間聞江梅片片傷春暮岸柳絲絲  
縮夕曛曲罷無端倍惆悵階前涼露濕紛紛亦同余 召試  
友也

梧門詩話云王礪齋爲相國文恭公冢孫幼穎異公愛其類  
已且生同甲因名而字之文恭以鴻博起家礪齋亦由進士  
列薦於 朝一時傳爲佳話乾隆甲子礪齋以隰州守留史  
局校書感懷云無端潘髮已星星誤我槩鉛檢汗青滿地落  
紅人已往傷心猶坐草元亭悔讀南華恨入义半生虛願向  
誰賒東塗西抹成何事潦倒風塵日已斜蓋深以不入翰林  
爲憾也

王系字

山西榆次人雍正丁未進士大同府教授由山西

巡撫覺羅石麟薦舉

史鳳輝字南如江南宜興人雍正己酉舉入內閣中書由兵部  
侍郎楊汝穀薦舉

南如嘗受業漳浦蔡文勤公之門博綜古籍敦尚行誼不僅  
沾沾於章句之學者

胡天游一名駮字稚威號雲持浙江山陰人雍正己酉副貢生  
由禮部尙書任蘭枝薦舉著有石笥山房集

雲持性耿介學極淵博才思浩瀚滔滔莽莽下筆數千言立  
就瑰宏奇麗觀者莫不驚服湖北萬御史年茂目爲浙江一  
人已已 詔舉經學大學士史公貽直協辦大學士阿公克

敦以學問淹博工部尚書劉公統勲以品行端潔博覽經籍  
倉場侍郎彭公樹葵以爲人樸直潛心經學大理寺卿王公  
會汾以淹通經史博習藝文交章保薦其爲當時名公卿所  
推重如此

齊息園石筍山房集序云曩者詞科之役海內徵士二百餘  
人畢集京師才學各有專長而言詩文工且敏磊落擅奇氣  
下筆驚人矯挺縱橫不屑屑蹈常襲故雄深瑰偉足與古作  
者角力必首推山陰胡子稚威操行清嚴不但以詞章顯初  
入都與予共館任宗伯邸第晨夕商榷讀書未嘗挾一刺於  
公卿公卿素慕其名思一見不可得其爲詩文多在友朋聚  
會時卽席揮豪甫脫草人卽持去無所惜久之遂傳誦徧人

口余與杭堇浦嘗力勸其訂存含笑唯唯訖無成編經學之  
薦名姓至勤九重記憶以稚威之才遇時而不獲盡其才  
此則稚威之命也今年夏得其子元琢去冬書方刻遺集乞  
爲序憶予告病還里時稚威送至潞河舟次執手歛歔謂何  
時復得相見嗚呼孱軀猶在良友已矣悲夫

袁簡齋胡稚威哀詞云首相西林鄂公欲見稚威不可強聘  
焉雅跼相對問兩戒形鬻九乾蹶度八十一家文墨口汨汨  
如傾海相驚揚於朝曰必用胡某以榮館閣未幾試殿上  
諸人捧黃紙加墨而稚威鼻鼾不止血汚其卷幾滿相公  
嘆息延爲三禮館纂修相公薨稚威益困賈長安半椽自居  
四方求文者輦金幣踵門而稚威性歌呼宴客所獲立盡公

御徵德錄卷之九  
九  
卿爭欲致門下稚威意氣岸然不屑一顧策文至二千言論  
或數十字與常式格不合三改乙科十六年再薦經學有一  
品官忌之爲蜚語聞

上御正殿問今年經學中胡天游何如衆未對大學士史公貽  
直奏胡天游宿學有名

上曰得毋奔競否史免冠搖首曰以臣所聞太剛太自愛  
上默然自後薦舉無敢復言稚威者

朱梅崖胡稚威傳云天游少好奇任氣有異才於書無所不  
窺應 召入都主任尚書蘭枝家四方文士雲集每稠人廣  
座天游輒數千言落紙如飛文成輿博見者嗟服天游於文  
工四六偶儷得唐燕許二公之遺詩亦雄健有氣古文自言

學韓愈澀險處時似唐劉蛻元元明善非其至也然自喜特  
甚一統志成當進

御鄂張相國屬表於齊檢討召南檢討因推天游鄂相國驚歎  
其文欲招之檢討曰天游奇士豈可招耶卒不至其任氣不  
肯輕下如是居京師十餘年名日以盛忌日以深歲辛未舉  
經明行修爲忌者所中而罷蓋天游負才名三十餘年再膺  
特薦卒不遇而天游亦已老矣嘗與田侍郎懋有舊田家居  
山西因往依之卒於蒲州

越風云胡天游榜姓方浙江北直兩中副榜疎放不羈博極  
羣書下筆千言未嘗起草生平所著經史論解古文詞賦甚  
富久困場屋後應鴻博試以血污卷易而復汚者再文章憎

命達非人力所能爲也

詞科掌錄云胡稚威溧陽任公所薦其座主也藻耀高翔才  
名爲詞科中第一所作若文種廟銘靈濟廟碑安順先生碑  
任御史趙總兵兩墓志遜國名臣贊序柯西石宕記皆天下  
奇作使李文饒權載之執筆不能過也以持服不與試丁巳  
補考鼻血大作納卷而出識與不識皆爲搯擊云

詞科餘話云溧陽任宗伯問士於門下士任編修應烈陳舍  
人兆崙首舉山陰胡稚威穉威方里居有九秋得厲伏淮周  
元牧長安齊東書札說座主溧陽公垂意鄙生許於制科濫  
加噓引感興述懷一百二十韻

隨園詩話云胡穉威以曠代才受知於大宗伯任香谷先生

其待之之厚不亞於令狐相公之待玉溪生也館於其家八  
月五日宗伯指庭前葡萄曰彼實垂矣若能以儕淮險韻刻  
畫其狀當令某伶進酒爲歡稚威刻燭二寸成四十韻一時  
傳誦後乾隆辛丑冬日嚴冬友侍讀在沈學士雲椒席上偶  
談及稚威以險韻詠蒲桃事沈因指席間橄欖命其門人陳  
梅岑云汝能以十三覃韻賦此否陳卽席成二十韻又云丙  
辰諸徵士進京師余獨心折於胡稚威嘗言吾於稚威則師  
之矣於元本循初則友之矣其他某某則事我者矣稚威駢  
體文直掩徐庾散行恥言宋代一以唐人爲歸詩學韓孟過  
於澀拗今錄其近人者如明妃云天低海水西流處獨有琵琶  
堪解語斷然枯木本無情猶勝人心百千許詠諫果云苦

心衆所揮餘甘幾人賞置蜜錕鋸端或者如舐掌贈某營將  
云大聲當鼓急片影落槍危劍血看生瘦天狼對將髭皆奇  
句亦有風韻獨絕者曉行云夢闌鶯喚穆陵西驛吏催詩雨  
拂衣行客落花心事別無端俱趁曉風飛

鳧亭詩話云雲持胷有卷軸而筆又足以達之弱冠時爲文  
過於典贍猶有士衡才多之病及抵京師後蘊釀愈深全以  
灑氣流行蒼莽無涯淡嘗自謂所作當在儲畫山方望溪李  
穆堂三人之上第恃才嫚罵人多忌之余在周青崖齋頭見  
其詩鈔一本計一百五十餘首五言偏似少陵五古純乎漢  
魏惟絕句非所長耳此皆越風所未載者余曾勸其付梓雲  
持笑曰未能餬八口何暇鐫五言蓋自傷其貧也

西成姓 **氏**字有年號樗園鑲黃旗滿洲人雍正庚戌進士  
由兵部侍郎鎮國將軍宗室德沛薦舉後官禮部主事陞太常  
寺卿著有玉汝堂集

乾隆甲子長洲沈文愨公典試湖北樗園時任御史爲副考  
官以同徵友而共主試事悉心衡校得人稱盛

徐廷槐字立三一字笠山號墨汀浙江會稽人雍正庚戌進士  
候補教授由禮部尙書任蘭枝薦舉著有南華簡鈔墨汀詩草  
墨汀少工舉子業名重一時年四十舉於鄉主司爲臨川李  
穆堂侍郎何義門稱其得人削職後主戴山書院得其指授  
者咸自名家

方樸山徐笠山文後序云吾友徐笠山先生才士也治古文

作爲詩歌高騁負厲一滌滓窳而亦全其力於今時文往余爲之序竊舉李賀骨重神寒語題目之今又別幾年矣深妙奇博水神玉骨融爲一味而向之所爲寒與重者已欽其寶而莫能名又壽序云笠山年四十舉於鄉踰十年又舉於禮部文一出無不低頭拜東野者其後數年制科開人或以笠山名上余私獨念是役也殆可以違無經生之家法無有司之尺度擺脫韁柱不主故常以今之世不肯循諸生帖括宜無先笠山者而事乃大謬李將軍有言豈吾相不當侯耶且固命也

詞科掌錄云會稽徐笠山以進士改教授不工爲俳體試日用山陰王霖雨楓之詩爲考官所糾部議落職然其爲人自佳士文章峭刻清厲詩亦摧落凡近與山陰周幾山徐彩至交有詩九首哭之

越風云墨汀爲予庚戌同年友性情高曠言語妙天下不藉科名爲重輕試鴻博以山雞舞鏡詩雷同被議其實墨汀非不能詩也觀其軒轅臺篇雖太白何讓焉

鳧亭詩話云笠山今古文爲世推重吾郡能文之士多出其門雖不以詩名然偶有所得輒饒清永余猶憶其邨居詩云麥熟童催餅蠶眠婦守燈此等句尤真樸有味

劉暉澤字芳久湖南長沙人雍正庚戌進士四川宜賓知縣由四川巡撫楊秘薦舉著有斯香堂集

先生與陳句山銀臺同榜進士亦以縣令用分發四川學習

補宜賓令文章政事異於俗吏所爲大學士查郎阿總督四  
川纂修通志先生亦與編纂之役

詞科餘話云劉芳久以四川宜賓令被徵旣罷祁陽鄧獻璋  
方侯送其還任詩有云十二巫峯裏風流寄一官

張敘字冰璜一字賓王又字鳳岡江南鎮洋人

一作太倉人

雍正壬

子舉人由湖南巡撫鍾保薦舉著有易貫詩貫孝經精義後錄  
或問餘論

鳳岡深於經術易貫十四卷每卦以大象傳隸六畫下而以  
小象傳依乾卦例合編於六爻之後意在參酌古今本取其  
詞意相貫其於經旨頗多發明詩貫十四卷前有說詩本旨  
詩音表各一卷立義多參序說其遵朱者不復致詳於近時

最取李安溪之詩所論韻則專宗顧寧人之詩本音云

詞科掌錄云張冰璜以孝經五引詩書屬五孝節首蓋字此  
字乃釋詩語而斷庶人節之本無闕文又陋皇侃加開宗明  
義等目非是皆發前古之蒙丁巳有臨雍詩百韻未及獻

金鑑字志達江南江陰人雍正壬子舉人由禮部侍郎徐元夢  
薦舉

馬榮祖字力本號石蓮江南江都人雍正壬子舉人由兵部尙  
書江蘇巡撫高其倬薦舉後官河南閩鄉知縣著有亭雲堂石  
蓮堂等稟

石蓮淹貫史學專治古文遒勁有法深合古作者之旨嘗爲  
文頌九十二章以自道其利鈍得失之故當時推爲斲輪手

後宰閩鄉錢擇石宗伯送之以詩云昨者見除書得黔之仁  
懷山川萬里行何以慰朋儕

聖恩適改調雪霽春陽纔旋調鹿邑俱有善政尋乞歸性尤伉  
直與人交出示肝腑慨論古今事掀髯抵掌聲如洪鐘既耄  
無衰颯態就一官不竟其用一無所屑意

杭堇浦馬石蓮傳云君少負異才左國班馬之書若宿讀弱  
冠名雋一黷所爲制舉文雄邁駿厲桐城方望溪金壇王耘  
渠尤所愜心而俗目往往見嗤以是屢絀於有司王子始得  
一當而年幾艾矣詞科之制江南大吏以君名廁薦剡中宜  
必有合淹於時命復報罷君叩囊底之智復理故業屢不得  
志乃循例謁選人初仕閩鄉城廢不修大府韙其言發帑更

新閩十月而巖城屹然君自爲文記之創設荆山書院政暇  
親至爲諸生講授至移日晷不忍去研鞫獄訟黠胥豪役斂  
手不敢上下四境大治繼遷鹿邑如在閩鄉時而教士彌篤  
未幾引年歸年七十有六卒

詞科掌錄云馬力本爲文清道深亮見賞於博陵尹運使會  
一嘗擬劉彥和爲文頌百首又爲演連珠箴百首宜與儲六  
雅謂爲窮探窳邃瀘州先遷甫以爲奧衍橫鶩

詞科餘話云馬力本詞科既罷丁巳巳未連不得志於春官  
山陰胡天游賦長古二篇送之次韻者長洲沈德潛嘉定張  
鵬翀天台齊召南臨海侯元經皆擅勝場

隨園詩話云揚州孝廉馬力畚自負古文作家與汪可舟會

於盧轉運席上汪雖布衣詩才實出馬上馬意頗輕之汪又不肯自下於是二人終席不交一語後五日馬病卒沙斗初戲可舟曰汝與馬君前日席間已陰陽分界矣

馬樸臣字相如江南桐城人雍正壬子舉人內閣中書由工部侍郎張廷璩薦舉著有春遲詩彙

相如爲人豪俊不羣詩亦超軼埃壘曾寓揚州天寧寺有詩云客到幾人曾跨鶴我來三月不聞鶯爲世傳誦歿後其弟湘靈屬會稽陶篁村索遺稿於沈平山處篁村因題卷末云山陽人去笛聲秋斷紙零縑小宋收七字淒涼三月客不聞鶯語住揚州

詞科掌錄云馬相如才氣豪邁所至傾其坐人與方南堂貞

觀爲石交爲詩懶自收拾所作隨手散去有弟曰蘇臣字湘

靈亦美士

隨園詩話云桐城馬相如山陰沈可山少年狂放路逢親迎者不問主人直造其家索紙筆替新婦催妝云江南詞客太翩躚打鼓吹簫薄暮天應是天孫今夕嫁碧空飛下兩雲仙隨郎共枕心猶怯別母牽衣泪未乾玉筯休教褪紅粉金蓮燭下有人看娶婦家頗解事讀之大喜飲以玉爵各贈金花

一枝

戴永植字于庭號農南浙江歸安人雍正壬子舉人由刑部侍郎王紘薦舉後官湖南龍陽知縣改餘姚縣教諭著有汀風閣集

農南襟懷曠爽學有本原詩精思構微滌去塵滓而又春容和雅非鑿險絕幽可比新建裘文達公稱其以才人之筆抒正始之音極爲得之

陸陸堂汀風閣集序云農南負倚上才蓄道德而能文章尤長有韻之語詩無體不備其比屬典麗似西崑性真流露似眉山而以史事入詩則驢背登樓諸集貫穿全史奔赴於手腕之間上下千年縱橫萬里是殆草堂嗣音匪直雄踞越壇已也

錢■題往來茗雪間集云湖上蘋開王暮雨林間客夢沈秋涼清詞麗句傾時輩何似孤城戴夕陽集中有一匝孤城半夕陽之句時人以此名之

張鏡壑題集後云鍊字獨操良史法運於醋甕苦吟餘詩家例得真名句一字號君爲戴漁集中答箬冷挂水清淺一疋鷺鷥漁夕陽藝苑爭傳爲絕唱

夏之翰字知畏江西新建人雍正壬子舉人由光祿寺卿劉吳龍薦舉後官湖南布政司庫大使乞歸著有檀園初藁

先生詩胎息漢唐長於五七言古真情樸厚於學無所不該後肆力於洛閩之學爲庫大使不名一錢暇仍讀書不輟詞科掌錄云夏知畏古詩淳古有真意雜著原本經術不事塗澤客惠郡王所旋以憂歸

詞科餘話云夏知畏試不得志作砥志賦又有四十初度病中答妻弟裘曰修叔度韻詩

進雲龍字賡若號耕石江南吳江人雍正壬子順天副貢生由兵部侍郎署湖北巡撫吳應棻薦舉著有汗漫吟

耕石高才煥雅傲岸不羣詩文洋洋灑灑千言立就踔厲之氣凌壓儕輩後自滇復之京金檜門總憲有耕石宿寓齋與陳句山齊息園握手感嘆一律云猶逐孤雲到帝城相逢令我氣崢嶸正平方寸藏山岳師魯邊疆策甲兵乍喜盍簪聯舊侶幾多泛梗失同盟潞河且匆匆去十載襟懷待細傾

沈菽林送進五經耕石序云進君耕石博學能文孝於親篤於朋友少卽受知於其鄉之耆長長而好遊其來京師公卿大夫士識與不識無不知進君者然才高而數奇嘗鬱鬱不得志好從余飲飲少輒醉歎曰家貧親老我髮亦且種種矣子之視我爲何如哉余聞之惻然蓋進君視余厚兩人者相與莫逆余雖才不逮進君什一而境遇坎壈有不翅倍蓰焉者安能不交感於中乎今年春黔陽中丞元公聞進君名譔書具幣不遠萬里遣使延致幕府進君感其意將成行矣過余爲別余謂古之人有切知己之分而不憚行之遠者顧君有老母在今

天子重文學 詔舉宏博之士君才宜應 詔入承明備掌故以答 國家養士恩而以祿奉其親君親之於朋友緩急先後宜何從君曰我母年八十我歸壽吾母且以黔行告必不得請將却中丞之聘焉余以進君之歸出於至性也義不可

以留因集朋徒酌之酒而賦詩以贈其行

詞科掌錄云迺耕石才氣高岸遊道最廣諸生謝給月俸表其手筆也爲京都賦數千言句甫全紹衣錄入詞科據言試後游滇中入慶國公幕不復應制舉矣

費開岐松陵詩話云耕石幼穎敏有神童之目遊何侍講義門門深器重之一時名噪試京兆中副車第一人咸惋惜耕石意泊如也制府慶公向爲莫逆交隨至滇南留幕中三載與公唱和成集漱水芙蓉其風流至今可想見也

楊書巢秉初云耕石有水村取適圖沈文憲題詩云天隨風趣想依稀短棹衝寒雪尙飛但使寸心無一與取魚取適總忘機荻蘆鼓昨發清音可是吳吟是越吟生計由來最安穩釣船不到大江心水鄉到處是尊鱸合向煙波作釣徒聞喚樵青蕩輕槳順流直溯女兒湖萬里崎嶇行路難滇黔茶蜀興俱闌歸來倍覺風光好珍重生涯釣雪灘

張鳳孫字少儀江南華亭人雍正壬子副貢生由兵部尙書江蘇巡撫高其倬薦舉後官貴州貴定知縣歷陞雲南糧儲道改刑部郎中著有寶田詩鈔

少儀醇謹樸厚性極真摯詩辭秀麗凌轍一時乾隆甲子復中副車已巳詔舉經學大學士張公允隨以學問淹留留心經術貴州巡撫愛公必達以潛心經術尤善於詩交薦之沈菽林隱拙齋文鈔云少儀父出宰印江以舊事牽連禍且不測少儀詣闕急父難時奔走四方衣履俱敝形容結韜

若不終日卒出父於刑部籍 輦下自宰執以至士友胥重  
其至行稱張孝子其文傑出一時所至傾倒名聞天下後舉  
宏詞不第兩副賢書因就職黔中官貴定知縣本躬行以爲  
治有古循吏風

詞科掌錄云張少儀父之瑣任貴州印江令以負帑下獄少  
儀走萬里之京師徧貸於所親知卒得論出駢體清麗詩草  
秀傑屣履所至諸公皆折節下之

隨園詩話云蘇州張少儀觀察爲諸生時封公謫戍軍臺徒  
步入都爲父贖罪一時有三子之稱蓋云公子才子孝子也  
沿門托鉢尙缺五百餘金偶與李玉洲先生席上言及此事  
伶人劉三慨然曰此何難公子有孝心我能相助遂徧告同  
人設席江南會館請諸豪貴來已乃纏頭而出一座傾靡擲  
金錢者如雨果得五百餘金盡以與張而封公之難遂解又  
云少儀母顧恭人若憲卽畢秋帆太夫人母也有挹翠閣集  
與武林林以寧顧熒齊名隨宦牂牁卒於官所

劉大櫨字畊南號才父又號海峯江南桐城人雍正壬子副貢  
生由內閣學士方苞薦舉後官教諭著有海峯小稱等集

近世言古文辭者推方侍郎望溪先生海峯學於望溪却不  
似望溪而能自成一家已巳大學士張公廷玉以經學保薦  
諸城竇東臬先生少所許可獨與海峯論文極爲折服惜終  
於學博然其文足以傳矣

海峯集與高督嵯書云明公欲以櫨充博學宏詞之選將薦

之

天子而未知槐之任受否也夫槐素非山林逸遺之士不求聞  
達以爲高者客遊京師八九年矣皇皇焉求升斗之祿而不  
可得智窮力屈乃一爲省觀而歸歸未數月又將負篋擔囊  
駕言遠涉持貨賄日遊於市豈其辭沽直者雖然博學美數  
也宏詞高名也入而在位以朝夕備

天子之顧問重任也空空而爲博芟芟而爲宏槐滋愧焉無所  
挾持不量粗鄙而肩荷天下之重任槐滋懼焉既歸之一月  
卽欲求船東下聞太守尹公已遷爲運使將及涼秋稽首明  
公之庭階又不幸有采薪之憂於今三月餘矣雖獲小愈而  
氣血肢體未能和暢是明公之愛育人才出於中心之誠懇  
而槐終不克享德於明公也

吳荆山海峯文集序云去年春予遇劉子畊南於旅舍與之  
語溫然以和叩其胸中之藏浩然不可以度量計予固異劉  
子非尋常人既而出其所爲詩賦古文詞以示余讀之洋洋  
乎才力之縱恣無所不極而斟酌經史未嘗一出於矩矱之  
外因與之訂交攜其文至京師以示搢紳大夫莫不以劉子  
之文爲非世俗所及踰年劉子來京師復時出其近著則每  
進益上蓋劉子之才固足以追步古人而力爲之不止方將  
與古之莊騷左馬杜李諸人馳騁上下而非徒爲一世之聞  
人已也

詞科掌錄云劉畊南雍正己酉壬子兩中副榜善古文有小

稱集吳縣吳文恪公有劉生詩傲昌黎卽其韻贈畊南

隨園詩話云桐城劉畊南以古文名家程魚門讀其全集告

予曰畊南詩勝於文也聽琴云香臺初上日檐鐸受風微好

友不期至僧廬同叩扉彈琴向佛坐餘響入雲飛余亦忘言

說烏棲猶未歸獨宿云江村黃葉飛猶掩蕭齋臥時有捕魚

人榜聲窗外過真清絕也哭弟云死別漸欺初日諾長貧難

作託孤人


王士讓字尙卿福建安溪人雍正壬子副貢生由福建巡撫盧

倬薦舉後官湖北蘄州知州

詞科掌錄云王尙卿出陳進士句山之門研精三禮力學不


倦試後留京師當軸薦入三禮館

鶴徵後錄卷第六



海寧馬 涵校

鶴徵後錄卷七



嘉興李富孫既汙甫輯

與試未用二十三人

閻介年字葆和直隸蔚州人雍正癸丑進士由兵部尚書直隸  
總督李衛薦舉

張廷槐字掄翰江南江陰人雍正癸丑進士由兵部尚書江蘇  
巡撫高其倬薦舉

桑調元字伊佐一字崧甫浙江錢唐入雍正癸丑進士工部主  
事由都察院左副都御史陳世倌薦舉著有論語說躬行實踐  
錄崧甫初續等集

先生為孝子天顯子少即博覽強識以文章馳驟一時後乃

講學受業於勞餘山尤留心宋儒之書雍正癸丑召試通  
知性理

欽賜進士授工部屯田司額外主事乞養歸里有別業在東臯  
闕餘山書屋以友教四方之士論文講道從者雲集比於河  
汾之盛如錢蔣石宗伯盧抱經學士俱出其門學士為先  
生女夫名  
譽重海內當事咸相幣聘歷主大梁道山濂溪歷下諸講席  
敦學尚行所著學規皆近裏著已在於真實以期為明體達  
用之儒時執業者無不欽為桑門弟子

崧甫集自序云予年十四五及餘山先生之門先生教之行  
所言悅而學之未能也尋為朋儕率率傲作詩古文辭年少  
氣盛伸紙輒千言不數年卷帙填溢既而省觀之知弗善悉

棄去思孳經討古以求其所自得謀養走四方苦聖賢載道  
之書如騎而觀佳景即小憩流連恒不厭乎其心五車四庫  
夢想未能卒讀以是為恨然自是筆墨亦知慎矣迨遊京師  
為人作酬應文字例不存片楮中年厭薄蟲篆之為觀薄有  
所自見竊講求當世之務漫浪一出抱愚守拙竟不可施遂  
請急歸有終焉之志少愛山水登眺適興時時發為歌詩此  
景歷蒼素髮不變涉世懷古亦嘗振筆抒所鬱塞本不知古  
作者意亦不遑撫古作者海內著述家林立予耽閉戶稀與  
之往還總角之交老蒼之友磊砢寂寞之士膠漆無多屈指  
年來凋喪畧半存者率星散故有韻無韻之文贈荅最簡諸  
草稟委做篋中門人輩私相鈔錄將付剞劂予恐其雜沓摭

收定詩十四卷文六卷嗚呼予豈以是爲足行世傳後哉顧  
自念童年稟先君之訓奉人師爲師疲駑未克自立年向五  
十碌碌無成愴焉痛心若攢芒刺區區無用之言非欲寶千  
金敝帚亦非留雪泥鴻爪聊志吾愧而已

詞科掌錄云桑發甫任工部額外主事少有雋才賦鎮海樓  
詩多至四百韻

隨園詩話云余祖居杭州大樹巷鄰有隱者桑文侯鬻粽爲  
業性至孝父病膈文侯合羊脂和粥以進父死乃抱鐻而哭  
人爲繪抱鐻圖徵詩萬君光泰詩最佳其詞曰羊脂數合水  
一芻病父在牀惟噉粥父能噉粥子亦甘粒米勝于五鼎肉  
升屋臯某無歸魂束薪斷火鐻寡恩牀前呼父鐻畔哭抱鐻

三日鐻猶温嗚呼恨身不作鐻中米臨沒猶能進一七謂鐻  
不聞鐻有耳文侯之子發甫先生性孤癖能步行百里棄主  
事官裏糧遊五岳留別袁石峯云莫定畸人物外踪夢魂飛  
入碧霞重浮雲形似世情幻秋樹色添遊興濃白練橫過天  
際馬烏藤直上嶺頭龍憑將一斗醺糜汁灑徧天門日觀峯  
過華山云華山門下兩盈盈玉女秋期會玉京十萬雲鬟梳  
洗罷漫空盆水一齊傾嵩洛雜詩云鐵梁大小石縱橫似步  
空廊屨有聲世外多情一明月直陪孤影到三更非深於遊  
山者不能言

李引樹云先生性好遊徧歷五岳自署獨往生又號五嶽詩  
人所至吟詠成帙有洞庭嵩山華山泰山衡山恒山閩嶠等

集皆能攄所自得先生文孫庭樸與余同舉於鄉有文行  
沈瀾字維涓號泊村又號法華山人浙江烏程人雍正癸丑進  
士由兵部侍郎署湖北巡撫吳應棻薦舉後官江西瑞州知府  
著有雙清草堂詩

泊村出守瑞州以廉潔自守興利剔弊民懷其惠與郡人恒  
論學賦詩爲風雅領衷生平所作多典則深醇如田家雜謠  
等篇尤得古樂府遺意

隨園詩話云湖州進士沈瀾詩近皮陸人多輕之然與雅處  
不可磨滅寄懷杭堇浦云休向江潭悵獨醒青山偃蹇  
庭枕函自秘嫋嬛記農社還修耒耜經小艇瓜皮乘月泛清  
歌菱角隔簾聽朝衫拋却饒幽興好伴維摩著素屏步履經  
過屢結趺同牀各夢一悲吁篷窗聽雨都元敬酒郡移官張  
藐姑琴作家資空送別鶴分俸料耐償逋耦耕他日期相訪  
穩臥瓜牛號野夫

徇西雜記云沈泊村以騷壇耆宿自期許官江右時  
嘗輯西江風雅金檜門學使稱之采錄雖未該備而於乾隆  
初年西江名作網羅殆盡去取頗有別裁

楊廷英字耆侶江西新建人雍正癸丑進士由光祿寺卿劉吳  
龍薦舉後官河南尉氏知縣著有杜詩註

李光型字儀卿福建安溪人雍正癸丑進士署河南彰德府  
河同知由戶部侍郎趙殿最薦舉著有易通正洪範解詩六義  
說文王世子解天問解

儀卿深通經術得其本原著述淵邃能繼文貞公一家之學  
試罷嘗以薦充經史館校對條辨異同頗爲精核

詞科掌錄云李儀卿雍正癸丑以性理 召對

欽賜進士試用知縣署彰德同知潛心經學與兄檢討光燠廣  
卿齊名人有二李之目儀封張司寇撫閩時爲序其經說在  
河南時著農書輯要以教民

牛運震字階平號真谷山東滋陽人雍正癸丑進士由山東選  
撫岳濬薦舉後官陝西秦安知縣歷知平番縣著有空山易解  
空山堂春秋傳允吾草歸田吟空山堂集

先生爲秦安令嘗以實心愛民自矢遇事剖斷明決平時所  
講求者無不見諸施行刑清政簡一時稱爲良吏其學博涉

羣書於金石考據爲最深有金石圖二卷本邵陽鐫工褚峻  
所摹先生各系以說其假借通用之字亦畧訓釋後復自增  
益凡六十圖並極精審經義亦頗孳究易解務在通漢晉唐  
宋爲一大旨主理不主數故於卦氣值日等說皆排抑之

先生與五弟書云吾在秦載餘政簡無事審斷平允聲名漸  
著甚爲上憲所知百姓亦大懷服吾本非長才不過殫精竭  
慮極吾耳目所能而出之以至誠將之以小心事自易辦保  
甲嚴行禁令漸張鬪爭獄訟日卽於少五月中縣北玉鐘峽  
山崩塞河河水上浸居民漸就漂泊吾聞報單騎往視親荷  
畚鍤募率丁夫併夜開濬凡兩日夜河開水下大小七百口  
獲安堵水退緣山步行載米與錢俵諸災戶百姓資以活濟

吾爲此事廢寢食心力幾瘁近日清查戶口確覈地種異日  
另有成效至于責士過嚴懲盜已甚初來時誠亦有之五弟  
以爲言大是但邊鄙之地風俗疵悍不如此則法不立令不  
行民不可得而治且吾當官治民要通盤打算與其輕刑十  
人而不足不如重處一人而九人畏是我懲一而恕九也吾  
惟於此行之不疑然邇日吾法禁已行漸亦歸於平允當俯  
從吾弟之言也又與人書云僕爲縣官有三字曰儉簡檢而  
已儉者薄於自奉量入爲出所謂以約失之者鮮此不虧空  
不婪贓之本也僕願爲秦安中產分衣食甘苦簡者令繁則  
民難遵體克則下難近一切反之毋苛碎毋拘執毋聽陋例  
毋信俗諺儀從可減減之案牘可省省之當無日不與百姓  
相見差與之齊而訊其苦樂惟求一切便民雖驅世笑我以  
黃老吾不知也檢者天有理人有情吏部有處分上司有考  
課豪強在國將吾伺奸吏在衙將吾欺入一錢乙諸簡得毋  
納賄施一杖榜諸冊得毋濫刑耶今日去官吾倉庫不畏後  
任明日還鄉吾心跡可白友朋此又所謂檢也三者僕實有  
所不能盡亦未必真是要道但以循其性之所近而勉其所  
可能已矣

詞科掌錄云牛階平臨洮岳公所薦山左碩學無在其右者  
旣不被錄海大司農爲悼惜者久之

盧雅雨山左詩鈔云真谷生有夙慧穎悟絕人張舍人完質  
嘗爲余言真谷之博浩無涯際而深自謙抑獎進後學常如

不及試宏詞不第深爲惋惜舍人篤行君子不妄交者余因  
心儀真谷後十餘年余再轉運兩淮始與真谷相見於揚州  
官舍叩其所學乃益歎舍人之不吾欺也真谷才高學富其  
上下千古辨若懸河而折衷至細獨稱詩與余不同然持論  
具有根柢年五十有三無疾而歿惜哉其家傳云真谷未死  
之前月屢夢遊金碧樓臺一夕復夢如前旣醒語家人曰將  
復尋吾好夢慎勿驚我及午遂逝慧業文人有玉樓之召其  
信然耶

王世樞字斗初號訥齋江南寶山人雍正乙卯舉人由刑部侍  
郎勵宗萬薦舉後官崑山縣教諭

先生本嘉定學生居邑之南翔里析縣改隸寶山雍正戊申  
拔貢乙卯舉京兆試見聞該洽爲名孝廉 召試放還以明  
通榜選崑山教諭講畫指授其所造就者甚衆

馮元溥字 江南金壇人雍正乙卯舉人由內閣學士春山  
薦舉

金焜字以寧號赤泉浙江錢唐人雍正乙卯舉人由工部侍郎  
王鈞薦舉後官國子監典簿著有蠡測錄妙明書屋詩濃蘭詞  
金繪占先生少時嘗館於龔蘅圃侍御田居所盡讀其藏書  
學問益該博詩古文與杭厲相埒令子赤泉及質甫幼承庭  
訓早著才名大科之徵並列薦剡時人多豔稱之

詞科掌錄云金赤泉內閣侍讀志章令嗣也詩律精細世其  
家學

尊聞錄云江聲兩丈夫子俱稟家學能詩文其長以寧學於  
余曾見其游清平山句云僧分古寺東西隱人踏山雲一再  
來自注云寺有東隱西隱兩房又楊柳青時夜雨多皆佳句  
也

張懋建字介石號石癡浙江鎮海人雍正乙卯舉人由浙江總  
督程元章薦舉後官福建長泰知縣著有易學五經韻纂讀書  
樂續越書肯綮錄學校祀典考蛟川耆舊詩庭學草介石初集  
石癡續學藪行博通經史以己酉選貢補國子監教習乙卯  
登賢書後知長泰頗有政績民戴其德邑向有六賢祠遂配  
人為七賢

齊息園送張介石序云 子將之聞之長泰都下士友皆太  
息咨嗟謂以張子之學與才當用文詞取科甲登館閣不當  
屈宰小邑余謂不然張子之學與才將以為文詞之用乎抑  
將以行其志也將以行其志則親民之職莫如令政理之繁  
且雜其難為也亦莫如令志在愛民朝行焉夕即及于民矣  
夕行焉朝即及于民矣利與為典害與為去以張子之學與  
才而宰小邑其能用儒術為吏治宜恢恢乎游刃有餘而仕  
由令起則天下無不可居之職張子亦勉為其難無負其志  
而已

姚世鍊字念慈後名汝金字改之號真菴浙江歸安人雍正乙  
卯副貢生由兵部侍郎吳應棻薦舉後選湖南長沙縣丞以艱  
歸著有孤笑集五臺山遊草

先生與從兄蕙田同居友善並著才名試罷在三禮館最久  
書十上三中副車後銓長沙二尹將行復丁內艱歸巖海珊  
有詩云才華見許盧思道規矩難繩爾正平可想見其人  
詞科掌錄云姚念慈同鄉吳公所薦病不得試丁巳補考已  
擬進呈以卷中塗抹過多報罷詩才清雋律絕尤見擅場後  
以西林中堂薦與修三禮

陳句山紫竹山房集云庚辰重九前二日姚二念慈自金臺  
書院辭赴山右鄂中丞之招諸生送別有垂涕者不可無詞  
以贈詩曰罷尉河西遂去官客中爲客感無端青山直指雁  
來路白髮行飄風裏冠生計幾時歸雪水故鄉今日是長安  
東門帶草叢叢在待繫先生去鞦韆難姚廿年前選授某縣丞  
以病去任僕爲京尹時延爲山長

隨園詩話云余錄近人中有才未遇者詩號幽光集以待付  
梓采取未畢姑先摘數首及佳句存詩話中歸安姚汝金性  
落拓冠履欹斜有南朝張融風味謝吳眉菴少司馬薦啟云  
十年老女猶畫蛾眉百戰將軍空爭猿臂一時傳其工整題  
李將軍夜逢醉尉圖云隴西將軍雄且武猿臂閒來聊射虎  
良宵與客飲田間飲罷歸遭亭尉侮將軍醉矣尉未醒宿之  
亭下良復苦羸馬單車野次偕昏燈淡月殘更吐是時將軍  
正失官意豈須臾忘滅虜暫屈龍沙熊豹姿試聽鷺堠蝦蟆  
鼓畫師摹寫如目覩面帶微酣色微怒古者門官各有司彼  
候人兮實主之夜行必禁犯必罰由來啟閉惟其時今將軍

尚不得爾斯言良是非醉詞倘師文帝獎細柳此尉應得蒙  
恩知或如丙相恕酒失異日可藉聞邊機請俱一旦快私忿  
將軍之量宜偏裨看劍云齊金楚鐵擅名高碧血模糊舊戰  
袍不躍不鳴兼不化問渠何處異鉛刀念慈受知於鄂文端  
公公卒念慈哭云未報公恩徒一慟自憐此淚亦千秋在山  
左時有訛傳其死者後人都諸桐嶼太史贈詩云學道終朝  
銀闕去入都快比玉門還念慈答云欠來一事能逃否聞到  
同心自愕然

梧門詩話云念慈詠酒徒云氣從田竇筵前短興到荆高市  
上豪傭保亦應憐姓氏生涯原不稱旌旄逐客云故人書札  
雙魚懶商婦琵琶一雁哀倦僕云主恩酬過千頭橘世態若

如一片雲病僧云千劫難灰心寸寸一塵猶隔路重重癯仙

云桃非手種何堪竊玉不田荒却費耕吐屬微婉兼有寄託

李金瀾云姚貞菴為鄂文端公所器重薦修三禮書成將特

薦館職文端公卒姚僅敘縣丞感賦云雕刻千言雙鬢苦挽

回一命萬牛難又云折柳魂銷燕市酒開箱泪墮晉公嫌後

借公子弼之晉撫幕獲買山資得歸老著有中州紀畧

秦懋紳字子宏江南武進人雍正丙午副貢由工部侍郎王鈞

薦舉

潘遇莘字江南寶應人乾隆丙辰舉人由兵部侍郎署江

蘇巡撫顧琮薦舉

西林鄂文端公藩宣江左構春風亭以課士愛才若渴一時

英俊罔羅殆盡甄綜詩文為南邦黎獻集先生有擬賜安南  
國王詔詞意樸茂公稱其真善於摹古者

吳龍見字恂士江南武進人增生由兵部尚書江蘇巡撫高其  
倬薦舉乾隆丙辰進士授戶部主事累官 布政使著有薛

帷文鈔

詞科掌錄云吳恂士奉天高公所薦入北闈聯捷成進士派  
戶部貴州司額外主事詳事降調

凌之調字廣心號惕園江西新建人雍正丙午舉人由通政司  
使趙之垣薦舉乾隆丙辰進士授工部額外主事著有易論丹  
麓山居前後藁

惕園試鴻博後尋以乞養歸隄戶著書詩才浩瀚直欲規摹

盛唐不屑為纖靡之語累聘主講院當事咸為折服

李宗潮字坤四號蕉窗浙江嘉興人雍正甲辰副貢生由浙江  
總督程元章薦舉乾隆丙辰順天舉人選授廣西灌陽知縣著  
有二守齋詩鈔

蕉窗族祖為離院嶧山公次子幼聰穎受業當湖陸坡星先  
生深加器異遂肆力於詩古文辭年甫冠以選拔貢入成均  
文譽藉甚又為張文敏公照姪女夫時往來雲間預四焉齋  
文會每詩文脫橐黃唐堂焦南浦曹濟寰諸公必為之擊節  
入都名公卿爭相延譽益廣交四方碩彥為詩壇文社所撰  
述流播遠近尤精音律丙辰舉京兆試鴻詞報罷尋以薦入  
律呂館長白鄂文端高安朱文端並有國士之目川陝總督

慶公走書幣延入幕因遊秦隴訪漢唐遺蹟憑弔今古一發於詩所著秦蜀遊草識者謂可繼少陵秦州放翁蜀中詩云自是往來秦晉歷河東甘肅幕府晚年始就選人得桂林之灌陽值辦軍審馬匹無絲毫科派及民政尙寬平成懷其德焉

許晦堂梅里詩話云蕉窗爲齋院陳常仲子文采風流翩翩公子博聞強識聲在藝林詩體純雅不屑騁才使氣

陸朗夫耀云坤四外託沈冥天懷內朗足跡所至少不合意輒掉臂竟去余客晉陽同舍累月每見舉杯引滿語雜詼嘲坐客以爲笑樂嘗和阮籍詠懷百餘首

萬光泰字循初號柘坡浙江秀水人生員由浙江總督程元章

薦舉乾隆丙辰順天舉人著有轉注緝言漢音存正遂初堂類音辨柘坡居士集

先生應鴻詞之徵年甫冠上蔡程公嗟賞不置讀書能穿穴經傳詣極精微于小學音韻天文律算尤貫串獨有所得其著述皆卓然可傳非近世學者所能及

胡稚威萬循初樂于集序云予友循初自浙右來京師以詩聞國中甚久之所作愈多亦更自少凡數簡其篇之錄聚于篋者以爲稱乎人者之未有錄焉今夫治者烹金而和之色必竭其黝然者三竭而泉然秋鏡然洞然後善之循初之詩氣餘力完始絕巧麗而務窮所變試於朝雖不中已得京兆舉將歸秀州更一年當復集禮部吾卜子之來其聞之甚

之愈於今也夫且益遠矣

鮎埼亭集云循初應薦入京時人盛稱其詩予不過以詞章之士目之又十年遇齊次風於淮土爲予言循初學精進近人未見其比予始心重之然終未知其底裏也今年循初卒取其遺書讀之其穿穴六藝排比百家如肉貫鼎而尤卓然獨絕者則周髀之學也上自注疏考及諸史以至明之三歷呵龐喝利布算了了何其神也循初之述作種種皆有可稱然卽以是傳亦已足矣

袁簡齋萬柘坡詩集跋云亡友萬柘坡詩程魚門昵之陳古漁非之二人皆深於詩者也訟而質于余余按集中五七古沈摯之思如窮淵泉而縋出之真古豪矣近體殊少真氣說者謂爲宋人所累然宋名家絕無此種考厥濫觴始于吾鄉幹材諷說之徒專屏采色聲音鈎考隱僻以震耀流俗號爲浙派一時賢者亦附下風不知明七子貌襲盛唐而若輩乃皮傳殘宋棄魚菽而噉豨苓尤無謂也柘坡與余總角之交九原有知必喜聞過爲挾其瑕而大美乃以益彰矣

詞科掌錄云萬循初少年有高才詩骨秀朗小詞溫麗如周秦體若不勝衣而文章氣奪萬夫罷後客津門查氏倡酬之樂逾于都下

隨園詩話云同徵友萬柘坡精於五七古程魚門讀之五體投地近體學宋人有晦澁之病陳古漁專工近體宗七子聞漁門贊萬詩大相抵牾余爲作跋釋兩家之憾且摘柘坡近

體之佳者以曉古漁其題開元寺云古樹烏巢密疏寮客到  
稀鈴空隨瓦墜碑斷入墻填方鏡云自笑相逢同柄鑿封侯  
誰有面如田金鰲玉竦橋云曉來濃翠東西映也算蛾眉對  
仗班陳乃折服

王會汾字蓀服號晉川江南無錫人雍正乙卯舉人由兵部尚  
書江蘇巡撫高其倬薦舉乾隆丁巳進士改庶吉士累官吏部  
侍郎左遷大理寺卿著有梁溪詩鈔

先生少時家甚貧刻厲讀書肄業紫陽書院嘗徒步往來每  
課輒冠其曹同舍妒其才恒陵侮之後入詞館癸亥

高宗皇帝親試翰詹擢取第一陞侍讀學士洊歷卿貳操持嚴  
峻不苟扶同歿後著述散佚有塞垣等彙近存劉庶常嗣綰

家

詞科掌錄云王蓀服以進士改庶常己未散館授編修恂恂  
如下及鍵戶讀書無間寒暑詩章秀發亦館閣之英

顧響泉梁溪詩選云先生沈敏峻潔少刻苦下帷雍正乙卯  
舉鴻博丁巳成進士癸亥

御試翰詹

上親閱卷拔第一擢侍讀學士一歲三遷不數年洊陟卿貳立  
朝謇謇無所附麗方簡佐中樞遇京察自陳舉侍講學  
士齊召南自代朝野以爲有推賢讓能之風至以法司清要  
入直尚書房委蛇退食學者宗之出其門者咸以文行相  
高斯其流風餘韻遠矣

周玉章字琬大號葑闌浙江仁和人生員由浙江總督程元章  
薦舉乾隆丁巳進士改庶吉士散館授編修陞侍講學士

葑闌雅才淵思工文章于史學尤爲專長詩詞摧落凡近獨  
見超負爲諸生時與錢興沙朱東江並負盛名後入翰林校  
秘書館閣諸英無能出其右者假歸主婺州麗正講院從遊  
者麀至人文丕振

詞科掌錄云周琬大上蔡程公所薦旋舉京兆鄉試後成進  
士入詞館精史學能文章篤於氣誼詞賦迥異俗蹊

鍾獅字作韶廣東番禺人雍正壬子舉人由廣東巡撫楊永斌  
薦舉乾隆丁巳進士

倪承茂字稼咸號頓塘江南吳縣人監生由兵部尚書江蘇巡  
撫高其倬薦舉乾隆戊午舉人著有頓塘詩藁


頓塘安貧履素覃思六籍抱遺經聚學者教授里中有劉季  
珪王仲淹之風

詞科掌錄云倪稼咸精學家巷著錄甚盛與長洲沈確士齊  
名第不工詩耳

別裁集詩話云頓塘得名最早成名甚遲藝苑方重望之而  
倏焉辭世予哭之以詩末云比似方干差足慰生前鄉舉已  
題名慰之實悲之也素長于詞而詩亦工穩妥貼不落宋人  
以後

鶴徵後錄卷第七

同里徐林衡校



鶴徵後錄卷第八

嘉興李富孫既涉甫輯

與試未用十六人

沈德潛字確士號歸愚江南長洲人廩生由兵部尚書江蘇巡撫高其倬薦舉乾隆己未進士改庶吉士累官禮部侍郎予告歸加尚書銜贈太子太師諡文愨著有竹嘯軒詩鈔歸愚集文愨公為諸生時久困場屋省試十七上不第薦舉鴻博年已六十有四 廷試報罷驅車南還同徵諸公皆賦詩送之或恐不及再見旋以戊午舉于鄉己未登進士入翰林數年間驟遷禮部侍郎年七十八致仕歸

高宗皇帝賦詩以寵其行歸後眷益隆位極公孤家餐度支加

一官必 賜一詩優游林下者復二十餘年詩人遭際之盛  
與得天之厚古所未有也

傅玉笥矢音集序云先生爲諸生日姓名已聞 九重迨入

翰林應制 命和

御製消暑詩深愜

宸衷召對時惜先生博通晚達嘉先生風格老成遂同魚水契

合五年之內晉秩列卿 敕和殆無虛日中間用先生韻而

先生仍和

御製者十居三四此歐陽氏所云聖賢相遭萬世一遇者也辛

未冬先生祝

皇太后萬壽赴京 陛辭時

皇上製詩序以 賜先生因取全案釐定重彙而以 敕和詩

別爲一集起銷夏十詠後及 巡行嵩洛 省方吳會之作

題曰矢音昔穆修稱韓愈元和聖德詩平淮西碑柳宗元雅

章饒歌制作如經聳唐德於盛漢之表而先生隨所攄寫皆

寓古大臣忠愛之忱和詠柳絮而念萬姓之無衣和駿骨圖

而慮權奇之隱伏和觀打魚則思物命之宜留和各省告豐

則恐文具之無實和擘藍

御筆而陳山左鴻哀和豆班集而籌金隄蟻穴如此之流未易

枚數先生因事納規

皇上虛衷善受 賜詩有云笑予結習多難遣嘉汝臨文不忘

箴君臣之間兩無猜嫌此又韓柳當日未聞膺茲隆盛也前

予西湖志纂就附先生名進呈蒙

皇上賜詩代序兼文綺之錫今又挂名簡末何其幸歟

袁簡齋小倉山房文集云壬戌春公與枚同試 殿上日未

映兩黃門捲簾

上出賜諸臣坐問誰是沈德潛公跪奏臣是也文成乎曰未也

上笑曰汝江南老名士而亦遲遲耶翌日授編修屢和

上詩稱

旨遷左中允少詹事典試湖北歸 召入 上書房再遷禮部

侍郎校戊辰天下貢士公自知年衰薦齊召南自代而已請

老

上許之 命校

御製詩畢乃行

上賦詩以賜曰朕與德潛可謂以詩始以詩終矣歸後三至京

師入九老會圖形 內府

皇上四巡江南每一晝接必加一官嗟乎公以白髮一諸生受

聖人知三十年 賜詩至四十餘首其他酬和往來者不可勝

紀嘗進詩集求序

上欣然許之於小除夕 坤寧宮手書以 賜比以李杜高王

海外日本琉球諸國走驛券索沈尚書詩集既老所選詩或

不能手定庚辰進 本朝詩選體例舛午

上不悅 命廷臣改正付棗而待公如初此雖

皇上優老臣赦小過而亦見公之樸忠有以格天之深也

詞科掌錄云沈確士少工詩名滿大江以南有竹嘯軒詩鈔  
金壇王汝驥序以爲其爲詩也一以淳古淡泊發於自然爲  
至集中好句不可勝數但隨舉數則何一不天然神妙爲大  
歷以前諸詩人化境耶新城王尚書寓書尤滄澹宮贊問確  
士有云橫山門下尙有詩人不勝今昔之感云云辛亥春今  
少司農鳳臺王公爲兩浙運使時聘修西湖志與余同在志  
局後以戊午己未聯捷成進士改庶常

隨園詩話云西林鄂公爲江蘇布政使刻南邦黎獻集沈歸  
愚尙書時爲秀才得與其選後此本進呈

御覽沈之受知從此始也又云沈歸愚尙書晚年受

王知遇之隆從古詩人所未有作秀才時七夕悼亡云但有生

離無死別果然天上勝人間落第詠昭君云無金贈延壽妾

自誤平生深婉有味皆集中最出色詩六十七歲與余同入

翰林紀 恩詩云許隨香案稱仙吏望見紅雲識

聖人

蒲褐山房詩話云先生潦倒名場晚登科第膺西林桐城之

薦卽蒙

主眷不數年游貳春卿卿雲復旦之歌卷阿矢音之什賡颺稠

疊往昔所無繼以年近八旬陳情歸老復 賜詩以寵其行

有云清時老名士吳下舊詩人又有云玉皇案吏今仙客天

子門生是故人其嘉獎至於此及 鸞輅南巡 恩榮晝接

加銜食俸優禮彌隆宜海內誇爲盛事吳中傳作美談矣先

生少從學於吳江葉星期燮葉居橫山故阮亭尚書云橫山門下尙有詩人然先生獨綜今古無藉而成本源漢魏效法盛唐先宗老杜次及昌黎義山東坡遺山下至青邱空同大復臥子阮亭皆能兼綜條貫嘗自進其全集

御製敘言以高王爲比誠定論也所選別裁諸集滙千古之風騷聚一時之壇坫年至九十八而終蓋得於天者厚矣或又有反脣而譏者真少陵所謂汝曹昌黎所謂羣兒爾

金金粟光烈云沈文慤未遇時早已名重一世李敏達爲浙江制府延致當時名宿纂修通志文慤共與斯役後運使王公復聘修西湖志圖說十餘篇皆出文慤手論者謂不減鄺善長注水經筆及至晚達侍從賡颺莫與比盛史稱有唐以來詩人之達者高常侍蓋已瞠乎後矣

趙永孝字漢忠一字謹凡江南常熟人雍正甲辰舉人由詹事府詹事王奕清薦舉乾隆己未進士後官教授

虞山趙氏自前明文毅公以勲業著聞于時後稍衰替謹凡偃蹇半生晚得一第薦舉大科不得志旣釋褐改選教授嘗續增祀田以繼考志命子王槐定規條勒諸石

詞科掌錄云趙謹凡文毅公曾孫也潛心理學有尙論微吟百許篇

葉酉字書山號花南江南桐城人監生由太常寺卿王澐薦舉乾隆己未進士改庶吉士累遷左春坊左庶子降補編修著有詩經拾遺春秋究遺口下詩草

先生不喜爲科舉之文以家貧嘗爲童子師志行堅確不妄  
與人交讀書奮發冬寒雨雪每依燈火坐讀禮經門外雪深  
猶不輟尤邃於經學後入翰林纂修三禮其所著述頗有所  
得惟詩經拾遺以已意爲分合一變漢以來相傳之次第矣  
袁簡齋葉庶子曰下草序云同試鴻詞科同舉京兆同登進  
士同入詞館者余平生得二人焉其一爲歸愚尙書其一爲  
書山庶子尙書以詩名而先生以說經聞論者曰說經人多  
不能詩又曰詩頌聖者難工不知詩卽經也賡歌喜起半頌  
聖也果能說經而何有於詩果能頌聖而何憂其不工先生  
晚年督學楚黔歸恭逢

天子有詔

陵平西夷兩大典先生拜手賦詩彙而頌曰曰下草質不過樸  
麗不傷雅洵足以光揚緝熙昭章元妙因念先生與尙書俱  
持節衡文俱詠卷阿又俱 予告回籍以其道傳東南之學  
者文人遭際晚年益隆余齒最少官最卑三十年來與先生  
宦轍乖迕通一訊不可得今忽相依石頭城下花欄水窗時  
時張飲置具婆娑文墨先生白髮飄蕭而余亦蒼蒼在鬢文  
人遇合晚年益親然回首玉堂彼此都如天上自今以往所  
以重科名而報 國恩者其在數行文字間乎昔也同升翺  
翔王路今也同歸詠歌 昇平天寶爲之非偶然也故承命  
爲序而不禁欣然奮筆焉

金文淳字質甫號金門浙江錢塘人廩生由大學士管浙江總

自稽曾筠薦舉乾隆己未進士改庶吉士後出知直隸順德府  
有蛾子錄讀史卮言

金門根柢家學與兄赤泉互相砥礪枕經菲史聲稱藉甚詩  
賦俱典則溫醇得風人之旨後守順德以事落職曾擬大辟  
袁簡齋過保陽有詩云江南哀庾信儻耳老東坡白刃餘生  
健青雲舊夢多小窗重翦燭大海早揚波莫靳醇醪飲蛟龍  
脫網羅

詞科掌錄云金質甫爲赤泉同懷弟時有二難之目無錫嵇  
公試於浙省以第一人薦丙辰卽舉京兆秋試後以進士改  
庶常深於經術詩歌清婉秀出爲館閣後來之英倣王伯厚  
困學紀聞爲蛾子錄三卷

隨園詩話云余在都與金質夫裘叔度居最近金棋劣于裘  
而偏欲饒裘金移居裘以詩賀云追趨閨閣兩年餘一日何  
曾賦索居雪苑對裁新著稿風簾同校舊鈔書吟筒惠我寧  
嫌數棋局饒人實自譽早有聲華傳口下故知名士定無虛  
余作七古一首中四句云我願同年如春樹枝枝葉葉相依  
附不願同年如落花鸞飄鳳泊飛天涯裘讀而歎曰子才終  
竟有性情嗚呼此皆四十年前事今裘官至尙書聲施赫奕  
而質夫爲太守兩遭罪遣謫戍以死豈亦如花之飛茵飛溷  
各有前因耶金死後余搜其遺詩了不可得僅得其遊張園  
一首

尊聞錄云質孚登燕子磯云濤聲寒夕照亭影落孤鴻絕壁

疑烟雨虛堂肅暮風句法甚佳又春痕如夢怯風尖恐非近日少年能道此

袁枚字子才號簡齋又號隨園浙江仁和人廩生由廣西巡撫金鉉薦舉乾隆己未進士改庶吉士散館以外用補江南江寧知縣著有隨園詩話隨園隨筆小倉山房集

先生幼聰穎絕人年十二補博士弟子丙辰之粵西撫軍德山金公試諸徵士以銅鼓賦命題得先生作擊節不已至以國士相目并賦棗入省志薦表有云本朝鴻博停五十七年廩生袁枚裁二十一歲奇才應運卓識冠時臣所特薦止此一人先生有啟謝之在同徵中年最少報罷旋以聯捷入詞林乞恩歸娶一時戚里姻族咸以爲榮壬戌散館改官

縣令歷任溧水江浦沐陽江寧等縣後引疾歸尋起赴秦中念母年老陳情致仕先生年僅三十二僑居金陵之隨園頗饒亭榭水木清華倣西湖爲隄井爲裏外湖爲花港爲六橋爲南北峯長廊複房琉璃施窗琴書尊壘玉石之屬橫陳几榻梅百枝竹萬竿桂十餘叢小倉山色在戶牖間春秋佳麗彈琴賦詩煙霞供養無以過之當時名公卿爭相投贈莫不以一至隨園爲幸尤喜獎借後進凡有一藝之長無不揄揚汲引青衿紅粉並列門牆晚年好遊歷所至輒倒屣相迎凡武彞匡廬羅浮黃山天台雁蕩諸勝遊屐殆徧見者皆疑爲神仙中人

胡稚威送簡齋太史改官江南序云往歲天下以宏詞薦幾

二百人簡齋袁君與舉於其中年最少才最異自粵西使府隨牒來至名起公卿間落落大滿同歲生成服比於終童君年始十二干有司能試諸經甚悉因爲秀才自其鄉萬里以遊於蒼梧桂林其所望涉江漢彭蠡洞庭湘灘之波衡山之奇九疑之阻深詩歌恢瓌能與其地相詭傲其來京師也問以時之當務能議論問人黑白好醜能辨聞有賢者尙節慷慨者裕於文不涸涸於俗者能樂道余嘗以爲士於今而視若君者雖古之世猶將進焉無疑焉其於官尤惟翰林宜旣成進士選庶常三年以試翻譯勿辦外出爲令丞相不能請無所於留凡好君者嗟咨其去率載酒在邸爲之醉以慰其行

薛起鳳小倉山房集序云隨園先生論詩之旨一見於集中答歸愚宗伯書再見於續詩品三十二首凡古人所未道者業已自道之無俟再爲序述第按其所編始弱冠終花甲四十年之行藏交際具在於斯可當康成年表譜矣

詞科掌錄云袁子才奉天金公有國士之目力薦於朝在諸徵士中最爲年少兼有美才一時名滿日下後以戊巳聯捷成進士改庶常

隨園詩話云乾隆丙辰余二十一歲起居叔父於廣西撫軍金震方先生一見有國士之目特疏薦博學宏詞首敘年齒再夸文學并云臣朝夕觀其爲人性情恬淡舉止安詳國家應運生才必爲大成之器一時司道爭來探問公每見屬

吏談公事外必及余之某詩某句津津道之并及其容止動  
作余在屏後聞之竊喜探公見容必隨而竊聽焉呈七排一  
首有句云萬里闕前修薦表百官座上嘆文章蓋實事也又  
云己未 殿試予傲諸同年云霓裳三百都輸我此處曾來  
第二回蓋試鴻博曾在 保和殿也又云己未 朝考題是  
賦得因風想玉珂余欲刻畫想字有云聲疑來 禁院人似  
隔天河諸總裁以爲語涉不莊將置之孫山大司寇尹公與  
諸公力爭曰此人肯用心思必年少有才者尙未解應制體  
裁耳此庶吉士之所以需教習也尙進呈時

上有駁問我當獨奏羣議始息余之得與館選受尹公知從此  
始未幾

上命公教習庶吉士余獻詩云琴囊已成焦尾斷風高重轉落  
花紅又云江西帥蘭臯先生督學浙江余年十九考古學賦  
秋水云映河漢而萬象皆虛望遠山而寒煙不起公加歎賞  
又問國馬公馬何解余對曰出自國語注自韋昭至作何解  
枚實不知繳卷時公閱之曰汝輕年能知二馬出處足矣何  
必再解說乎曰尙有父馬汝知之乎曰出史記平準書曰汝  
能對乎曰可對母牛出易經說卦傳公大喜拔置高等後帥  
公爲陝西布政使竄死臺上余賦五古哭之又云余以雍正  
丁未年入泮今又丁未矣戲倣重赴鹿鳴故事作重赴泮宮  
詩云記得垂髫泮水遊一時佳話徧杭州青衿乍著心雖喜  
紅粉爭看臉尙羞夢裏榮華如頃刻人間花甲已重周諸公

可當同年看替採芹香插白頭和者百餘人

蒲褐山房詩話云子才少舉宏詞旋成進士嗣以散館出爲縣令初在江寧總督尹文端公絕愛其才旣丁憂再起至陝西與總督黃文襄臭味差池上書萬餘言不省遂乞病歸得廢圃於江寧小倉山下疏泉架石釐爲二十四景窗牖皆用五色琉璃遊人填集時吳越老成凋謝子才來往江湖從者如市太邱道廣無論費即蠢夫互相酬倡又取英俊少年著錄爲弟子授以才調等集挾之遊東諸侯更招士女之能詩畫者共十三人繪爲授詩圖燕釵蟬鬢傍花隨柳間業於前而子才白鬢紅舄流盼旁觀悠然自得亦以此索當途題句於是人爭愛之所至延爲上客適館授餐而子才又擇其精

饌彙作食單梓以行世故三十年中埽門納屣爲向來名人所未有才華旣盛信手拈來矜新闕捷不必盡遵軌範且清靈雋妙筆舌互用能解人意中蘊結今石庵相公在江寧時聞其蕩佚將訪而按之子才授以一詩公閱畢卽請相見頓釋前疑其詩得力如此然謝世未久頗有違言吳君嵩梁謂其詩人多指摘今刪蕪去佻自無慚於大雅矣

裘曰修字叔度一字漫士號諾臯江西新建人廩生由順天府府尹陳守創薦舉乾隆己未進士改庶吉士累官工部尙書加太子少傅諡文達入賢良祠著有叔度灌亭等詩鈔

文達天資明敏學有體用及官翰林受知

高宗皇帝入直內廷擢卿貳晉陞尙書前後三十年間內

參密勿外理簿書 朝廷大著作又多出其手兼屢奉使  
命勘治河讞疑獄丈地察邊東極遼瀋西踰哈密南至閩嶠  
大事無鉅細從容以應洞中窾要雖至紛紜膠轕無不剖斷如  
流先從祖敬堂先生出文達之門嘗館於邸第見其氣度靜  
穆通達治體立 朝侃侃直言無所依回偶值畿輔少雨  
高宗皇帝詢以禱旱文達以省刑修德陳奏有古大臣風烈  
詞科掌錄云裘叔度丙辰先舉京兆秋試後以己未成進士  
改庶常

隨園詩話云裘文達公與余同出蔣文恪公門下後余入都  
補官裘典試江南相逢在平道上見贈云車中遙指影翩翩  
忽訝相逢古道邊粗問行藏知大概諦觀顏色勝從前南來

我愧山濤鑑北去君夸祖逖鞭後會分明仍有約歸程期在  
暮春天是夜宿旅店見余壁上有詩和其後云漫空飛絮攪  
春情十日都無一日晴水斷虹橋迷古渡雲埋雉堞隱孤城  
故人已別心猶惜舊壁來看眼欲明我正聳肩閒覓句不勞  
津吏遠相迎已卯秋裘又典試江南到山中爲余誦之又云  
公出使伊犁襄贊軍事在黃制府行臺中卽席有作云使相  
鈞衡大將旗西來賓閣喜追隨談深席上杯行數坐久窗間  
日過遲任事肩無旁卸處安邊功是已成時 天兵討叛非  
勤遠此意須教萬姓知又元旦試筆云年年染翰揮豪手乍  
喜金鞭控鐵聰嗚呼以一書生而能走萬里贊軍機與沈文  
愨公以詩人而受

帝寵者皆近今所未有可稱吾榜中得人最多張乖厓不得擅美於前

蒲褐山房詩話云公神閱氣靜明敏自然事無大小談笑應之雖盤根錯節迎刃而解每遇朝廷大議論衆說紛紜而談言微中分肌劈理如奏刀砉然如土委地人人各適其意以去總督高君書麟謂大仙人不可湊泊者也公歿後相傳爲燕子磯水神後有家人遇之拜祝祠下云若果在茲願乞順風頃之東風果作挂帆而去故顧晴沙詩曰爐香燭影曉猶紅稽首陳情語未終試看靈旂微颺處春江已借一帆風

應定軒譚粹云文達公聰敏機警遇事神解超捷判決如流

入詞館以 大考擢高等驟遷侍讀學士游歷至尙書雖倭

內廷領六部而掌文衡審疑獄理簿書奉 命奔走足迹

常半天下五主鄉試一至湖北兩至江浙三至河南八勘八

利兩至江南四至直隸計議密勿無苛無縱皆能上符

睿慮下協輿情立 朝侃直無隱雖忤

旨時加 嚴訓不逾時 恩禮如初近代儒臣所僅有也

李金澗云乾隆癸酉公再典浙試先大父出其門後成進士

需次入都延課公子行簡深爲契合先大父憫浙人之歿於

京邸者創舉廣誼園以殯旅櫬實公與于文襄力贊成之

申甫字及甫號笏山浙江西安人布衣由大學士管浙江總督

嵇曾筠薦舉乾隆辛酉舉人授內閣中書累遷左副都御史著

有笏山詩鈔

乙未秋笏山與曹地山少宰錢堯石少宗伯扈 蹕熱河相

邀為同徵之會有二集三集各賦詩紀事宗伯有句云吉士

南宮先已達注謂少宰布衣西浙後方來注副憲籍江南以丙辰六月舉於浙江同試

保和殿給官燭今明

笏山詩鈔云七月朔日堯石招同地山少宰小集山齋為

博同年之會兩公各賦七律六章予亦和之書於堯石所畫

歲寒三友圖後以誌一時盛事又云丙辰秋冬之間萬樊榭

沈東甫沈幼牧迕耕石汪槐塘諸君同寓於接葉亭試畢先

生出都同人咸於此餞別

詞科掌錄云江都申及甫僑寓西安詩章秀拔律調尤妍

隨園詩話云丙辰 召試鴻詞到丙申四十餘年矣申笏山

在都中與錢堯石曹地山小集賦詩云尺五城南逐散仙歡

場一散似飛煙多生那得離文字後死何容卸仔肩醉後吟

聲驚戶外雨餘山色入窗前百人尙有三人在似得天憐亦

自憐嗚呼笏山歿又十餘年矣今海內 召試者只余與堯

石二人尙在近聞其年過八十亦已中風然則天憐自憐能

無再三誦之乎又云查他山詩以自描擅長近繼之者光祿

卿申笏山笏山卒後畢秋帆尙書梓其全集五言云雨聲涼

入硯花氣潤侵簾看桂云香于半路先迎客花已全開正及

時與同徵士謝茂秦云凡作近體誦之流水行雲聽之金聲

玉振觀之朝霞散綺講之異繭縑絲

蒲褐山房詩話云笏山副憲以中書舍人直軍機掌內制十餘年代言起草指事類情九重時嘉賞之爲詩抒寫性情羌無故實白樂天楊誠齋查初白其兔園冊子也好句如行攀石磴無人迹靜聽流泉冷客心幾日閒眠關竹戶一番細雨長秋花寒歸木末全無葉暖入梅梢漸有花尙有晚香留紫菊不妨小閨到黃楊至今有吟諷者歿後畢中丞爲選擇而梓之

張雄圖字號礪山河南洛陽人廩生由河東總督王士俊薦舉乾隆辛酉舉人

詞科掌錄云張礪山世有醇行當事聘主周南書院辛酉科舉於鄉

楊述曾字二思號企山江南武進人雍正乙卯舉人由戶部侍郎陳樹萱薦舉乾隆壬戌一甲第二名進士授編修陞侍讀贈侍講學士著有南圃文藁

先生稟家學於諸史尤精心質弗博而知要初侍父學士公在史局時方編纂明史綱目三編參預屬草方望溪侍郎見之稱爲史才聲譽大起召試報罷丁巳以國史館議敘候選知縣後入詞垣壬申

御試翰詹一等第三名晉官侍讀戊寅再應

御試適遇足疾左遷編修分纂通鑑輯覽復晉中允陞侍讀充日講起居注屢司文枋輯覽將脫橐而卒總裁大學士傅公以先生在事八載殫心編排書垂成而身故不獲邀敘錄

特奏 聞得

旨賞給四品職銜亦不啻生被其榮矣

蒲褐山房詩話云學士為內閣學士椿之子博綜史傳乾隆己卯冬

上修通鑑綱目輯覽 命學士及大興朱編修筠武進蔣編修

和寧仁和張舍人壽同余充纂修官發凡起例斷斷不少假

余輩常集其邸家人善治庖討論之暇輒出飲饌以恣燕石

酒酣以往諸譚四出猶見先輩風流也詩不多作偶獲二章

亦駸駸入作者之室

沈興齋學詩云丙辰諸徵士後復有由科第而躋顯仕者楊

岷山官中允時為同徵之會與劉相國繩菴陳通政向山中

光祿笏山錢詹事韓石集王太守礪齋錫壽堂設讌賦詩即

送太守赴晉未至者王大理晉川曹參議地山都門傳為

佳話

許伯政字惠棠湖南巴陵人雍正己酉拔貢生由湖南巡撫鍾

保薦舉乾隆壬戌進士累遷山東道監察御史著有易深詩深

春秋深全史日至源流

惠棠究心經學所著易深以圖書皆出太昊之世卦數生於

河圖著數生於洛書又兼取漢人卦氣納甲及京房易傳火

珠林之法而不用卦變及變占之法其詩深博考旁証取古

序及諸家之說詳審而折其衷日至源流皆論步算之術頗

有確當

沈樹德字申培號畏堂浙江歸安人廩生由大學士管浙江總督稽曾筠薦舉乾隆辛酉拔貢甲子舉人

竹墩沈氏一門羣從媿雅多才畏堂少從諸父兄遊耳孺目染學有根柢後詔舉經學湖北巡撫唐公綏祖以品行端

方淹貫經史列于薦牘

詞科掌錄云竹溪沈氏風雅自閣學心齋先生首倡翰編翰

翁繼之一門羣從有端文揆會素菴允相磨仲楷世同叔楨

國植庭樹槐殿擊柱臣及東甫三昆弟人人有集標映一時

於時申培尚在髫年故唱和集中不與省試河圖洛書辨小

阮篤師翰編恒稱之

吳槃字青然江南全椒人增生由安徽巡撫王紘薦舉乾隆乙

丑進士官刑部主事著有咫聞齋詩鈔陽局詞鈔

青然博學工詩與劉海峯葉書山諸人並著名於時試罷客

順天學使劉公墓中後領鄉薦成進士官至比部未能竟其

所用

劉海峯青然詩集序云青然世家滁之全椒少即工詩而居

室人倫之間獨遭其變其有無聊不適悲愁憤歎一託於詩

然哀而不傷怨而不怒中聲清越犖然其均當於人之心而

道然其獨愜於己之志與余同被徵召於京師相識也既

而同罹放黜相憐因相善也邸舍相近旦暮相過從每相與

飲酒留連愁思至夜分不寐青然曰我生平精力單儻於詩

非子無以知我子其為我序之余應之唯唯夫青然之詩人

皆共知其必傳於後而終以不遇豈非其命耶

詞科掌錄云吳青然詩學晚唐時有秀句五言如鳥歸山影  
外人語樹聲中露氣三山夜江聲六代秋迴風幽谷響返照  
遠江明七言如孤僧影入溪雲亂清楚聲移落照斜古木鷹  
盤青嶂迴虛堂僧定白雲閒皆入吳子華韋端已之室

張甄陶字希周號惕菴福建閩縣人廩生由福建巡撫盧倬薦  
舉乾隆乙丑進上改庶吉士散館出知廣東高要縣著有讀書  
翼註

惕菴博綜羣籍考核精詳翼註一書能條貫衆說而以己意  
折衷之在兔園冊中最爲有根據之學令高要以廉明著聲  
詞科掌錄云張希周總角卽肄業鼇峯書院潛心經義九易

寒暑巡撫奉天盧公學使奉新周公皆有國士之目丁巳始  
來京補試

詞科餘話云希周館於子同年友柴舍人宅距予寓不數武  
朝夕過從投分甚密情性溫粹才亦縱橫留京師未卽去

張星景字行之江西奉新人廩生由兵部尙書甘汝來薦舉乾  
隆乙丑進士官河南魯山知縣

先生究心理學嘗主講鷺湖追企陸子性剛直勇於有爲合  
魯山時倡修學宮置書院文教學興會水災悉心賑卹多所  
全活去官寓南陽主講衍疇書院所著詩古文詞不名一家  
余騰蛟字非睡號蓍庵江西武寧人拔貢生由兵部尙書甘汝  
來薦舉乾隆乙丑進士授刑部主事

盛劍山有歲暮懷非睡詩云永叔初為文北面于師魯淺深

各有涯後先或相取九畹漉日荒十年愧風雨其學問氣誼

可以畧見詞科掌錄以余為山東武定人然是科薦舉山左止四人恐誤今從槐廳載筆

耿賢舉字  山東館陶人雍正癸卯舉人由山東巡撫岳濬

薦舉乾隆乙丑進士著有泉山堂剩稿

雍正癸卯三月舉行鄉試各省同考官監臨先期始試以時

藝一篇時主山左試者為王侍講傳柯侍御喬年先生即中

是科解元聲名大噪

鶴徵後錄卷第八

